

Powšitkowne WOZJEWJENJA

njedźelu, 8. nowembra 2020

Wusyłanje Božeje mšě live

Serbskorěčnu Božu mšu móža wěriwi tutu njedźelu, 8. nowembra, znova jako livestream w interneće scěhować. Dopoldnja w 9 hodž. přenese so wona z Chróšćanskeje cyrkwy. Jeli měła so přichodnu njedźelu, 15. nowembra, tohorunja Boža mša w serbskej rěči live wusyłać, budže k tomu kaž nětkole na internetowej stronje www.posol.de link na nju podaty.

W Zdžěri žane kemše

Po wozjewjenju Radworskeho fararja Bena Jakubaša njejsu w Zdžěri tutu njedźelu, 8. nowembra, žane kemše. Tež kermušny nyšpor njebudže.

Wo česćowanju swjateho Bosćana

Wustajeńcu wo česćowanju swjateho Bosćana w Chróšćanskej wosadze móža sej zajimcy dlěje hač dotal planowane, mjenujcy hač do njedźele, 6. decembra, w Budyskej tachantskej cyrkwi wobhladać. Přistupna je wona za čas wotewrjenja simultaneje cyrkwy wot pónđzele do soboty wot 10 do 16 hodž. a njedźelu wot 12 do 16 hodž.

TCM podpěra dušepastyrski projekt fararja dr. Dzikiewicza

Dary za Pólsku hromadza so hakle klětu

Towarstwo Cyrila a Metoda z.t. (TCM) chce ze swojej akciju „Łužica pomha“ tónkróć projekt fararja dr. Daniela Dzikiewicza, kotryž je dobre džewjeć lět w Chróšćicach skutkował, financielnje při twarje wosadnicy we Wojdatach podpěrać. Tu trjeba wón, zo by w swojej wosadze z mnohimi młodymi swójbami – lětsa mějachu 80 přenjowoprawjenskich džěci a runje telko křćeńcow – porjadnje pastoralnje skutkować móhl. Wobšěrnje je projekt w Katolskim Posole z 25. oktobra wopisany. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Litawska“ přepokazać. Štóž sej darowanisku kwitowanku přeje, měł swoju dospołnu adresu zdžělić. Předsyda TCM Jurij Špitank skedźbnja na to, zo towarstwo w akciji „Łužica pomha“ koronoweje krizy dla lětsa nazymu za Pólsku dary njehromadzi, kaž je wone to zašće lěta činiło. Dalokož móžno, ma so to klětu nalěto nachwatać.

Kublanišćo zawrjene

Smochčanske kublanišćo swjateho Bena je wot 2. hač do najprjedy 30. nowembra za hosći zawrjene. To woznamjenja, zo tam w blišim času žane zjawne zarjadowanja njeprjewjedu. Tež Bože služby njesmědža so tam swječić, zdžěli rektor Sebastian Kieslich, kotryž wospjetne zawrjenje domu jara wobžaruje.

Serbske kemše w Drježdžanach

Drježdžanscy Serbja su na maćernorěčnu Božu mšu njedźelu, 8. nowembra, w 16.00 hodž. do cyrkwy swjateho Antonija w Drježdžanach-Löbtauwje, Bünauska hasa 10, přeprošeni. Po dotalnym planje změje kemše farar Gabriš Nawka z Kulowa.

Swobodne džělowe městno w starowni

Dom swjateje Ludmile w Chróscicach poskića wot 1. januara 2021 džělowe městno dohladowanja wobydlerjow. Městno ma so z 20 hodžinami wob tydžeń wobsadzić. Přizjewić smě so kóždy, kiž so rady ze staršimi ludžimi zaběra. Nadrobniše informacije poda wjednistwo domu pod telefonowym čisłom (03 57 96) 9 47 30.

Pytaja noweho tachantskeho kantora

Budyska tachantska wosada pyta noweho kantora. Do jeho nadawkow słuša mjez druhim přewjedženje a planowanje duchowneje hudźby a koncertow, prawidłowna služba jako organist a wumělske nawjedowanje tachantskeho chóra. Wuměnenje přistajenja je mjez druhim wotzamknjeny studij katolskeje cyrkwinskeje hudźby. Zajimcy měli swoje požadanje hač do pjatka, 15. januara, pisomnje w personalnym wotrjedže biskopskeho ordinariata, Käthe-Kollwitz-Ufer 84, 01309 Drježdžany, zapodać abo je na mailowu adresu bewerbung@bddmei.de pósłać. Nadrobne wupisanje džěloweho městna je pod www.posol.de wozjewjene.

Seminar k přihotej na mandželstwo njebudže nazymu

Seminar k přihotej na sakrament mandželstwa, kotryž měješe so pjatk a sobotu, 27. a 28. nowembra, w Smochčanskim kubłanišću swjateho Bena wotměć, dyrbi so aktualneho položnja dla přestorčić. Nowy termin so sčasom wozjewi.